



JUDISIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Periodu : Marsu 2012

Edisaun: 09 Marsu 2012

**Parlamentu Nasionál aprova Votu de Pezar ba Dr. Fransisco Xavier, Proklamador
Independéncia RDTL**

Parlamentu Nasionál iha loron 6 fulan Marsu 2012 aprova Rezolusaun Numeru 9/II konabá Votu de Pezar ba matebian Dr. Fransisco Xavier do Amaral, Proklamador ba Independéncia Unilaterál 1975 no eis Primeiru Prezidente Unilaterál RDTL, hafoin matebian hakotu nia iis iha loron 6 Marsu 2012 iha Hospital Nasionál Guido Valadares (HNGV). Rezolusaun Votus de pezar ne'ebé pasa ho votu unanimidade, nu'udar rekoñesementu ba dedikasaun matebian Proklamador Fransisco Xavier durante luta ba independéncia hanesan Proklamador Nasionál no Primeiru Prezidente RDTL. Alende halo votu de pezar, iha loron tuir mai, 7 Marsu 2012, Parlamentu Nasionál kontinua ho sesaun solene homenajen ba memória Fransisco Xavier do Amaral.

Iha rezolusaun ne'e, Parlamentu Nasionál rekoñese katak, Fransisco Xavier do Amaral hanesan proklamador ba independéncia nasional no ema primeiru ne'ebé brani hatudu-aan durante luta ba independéncia no sempre partisipa aktivamente iha luta ba independéncia Timór Lesté liu husi funda Asosiasaun Sosiál Demokrátiku de Timorenses ka ASDT, depois transforma ba Frente Revolucionária de Timór-Léste Independente (FRETILIN). Xavier mós hola parte iha istória luta nian, hanesan ema ne'ebé iha konsensu no dedikasaun bo'ot ba demokrasia. Xavier fila hikas mai Timór iha tinan 2000, hafoin sofre kastigu iha Indonézia. Matebian Fransisco Xavier

rasik mate ho idade 85 hafoin hetan tratamentu intensivu durante semana ida resin iha Ospital Nasionál Guido Valadares, Bidau.

Diretór JSMP Luis Oliveira Sampaio afirma katak *sidadaun Timór-Léste iha dever atu presta onra ba matebian Dr. Fransisco Xavier tanbá intrega ona nia vida tomak ba luta libertasaun nasional. Xavier nu'udar patriota, demokrata, nasionalista no idealista ne'ebé adere husi inisiu ba objetivu ba luta, liu husi envolvimentu porfunda iha polítika ba independénsia. Sentidu nasionalismu ne'e mós matebian Xavier hatudu iha nia vontade hodi kandidata- aan hikas ba iha kandidatu Prezidente da República ba períodu 2012-2017, iha minutu ikus husi nia vida.*

JSMP hanoin katak, Matebian Xavier manifesta sentidu espíritu no domin ida ne'ebé esepsionál tebes ba rai Timor. Tanab ne'e, JSMP ho neon tomak hakruk dala ida tan atu fó onra ba figura matebian Fransisco Xavier ba nia komitmentu atu kaer metin prinsípiu demokrásia, hodi mantein kandidata-aan fila-fila iha elisaun prezidensiál maski hatene hela katak nia sei la manan.

Ne'e valór no lisaun politiku ida ne'ebé ita presiza apresia duni, tanbá nia sempre deklara katak kompetisaun iha vida polítika la'ós atu haree semak manan, maibé importante mak bele hamoris demokrásia iha Timór-Léste.

Iha seremónia funerál ne'e, komponente Estadu tomak, liu husi Governu no Parlamentu Nasionál deklara lutu durante loron tolu hodi fo sentidu kondolénsia ba eis Prezidente RDTL nomós proklamador nasional. Tuir oráriu protokolu estadu nian, hafoin sesaun solene iha Parlamentu Nasionál durante oras balun, mate isin matebian Fransisco Xavier continua lori ba iha Palásiu Prezidente da República Aitarak Laran durante loron ida tomak atu fó asesu ba ema hotu hodi hato'ó sira nia sentidu kondolénsia ou presta onradu hafoin iha loron 8 fulan Marsu 2012 sei ba halo'ot iha semitériu Herois da Pátria Metinaro, Dili..

JSMP mós observa katak, maioria sidadaun iha Dili laran hanesan funcionáriu públiku, estudante inkluidu simpatizantes no militantes proklamador nian, sociedade sivil inklui ho intidade hotu ba ho sira nia sentidu kondolénsia ba matebian Xavier iha palásiu Prezidente República.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883/7295795